

林文忠公政書

審擬湯丹廠漢回互鬪各犯摺

奏爲審明湯丹廠漢回挾嫌互鬪致斃回民多命
燒屍燬房獲犯分別按例定擬恭摺奏祈

聖鑒事竊據署東川府知府李德生稟報湯丹廠漢

回互鬪致斃回民多命燒屍燬房等情當經前

督

臣

李星沅兼署巡撫任內飭令查勘嚴拏究

辦旋據署府稟報先後獲犯蘇耀等二十八名

經前督

臣

李星沅於奏覆回匪廠匪各情形摺

內陳明

聖鑒在案

臣

程喬采到任後一面嚴飭剿拏逸匪一

面飭將現獲各犯分起解省審辦茲據委員雲南府桑春榮等審明由按察使普泰議擬招解前來臣等提犯親鞫緣已死漢民倖坤發羅起潰及現獲之任連甲杜潰阮汶詳李小四王士銀任東姚亭潰張彩張添幅李萬蘇耀阮潮王呂珍詳胡中潰戚小二王潮有潘趕年潘啞吧趙端工羅起灤羅起沅蕭玉淋楊受淋與已死回民馬四銅錘及現獲之馬成潰馬石詳桂小

蘇馬得亮馬二草包均係巧家所屬湯丹廠住
人已獲漢民許成孝籍隸湖南武崗州寄居湯
丹廠充當客長回民清真寺後向有泉水厯係
漢回公共取用道光二十六年十二月間因天
時晴旱馬四銅錘等將水攔堵不准漢民挑取
倖坤發等理論仍照舊規漢回因此未睦是月
二十八日漢民蘇耀赴廠賣糖回民馬石詳向
縣不允互相爭吵馬石詳之祖馬成濱袒護邀
允桂小蘇馬得亮馬二草包並在逃之回民白

添發桂小鞍各持棍趕往馬成潰喝令桂小蘇將蘇耀拖翻棍傷兩臂膊兩腋漢民趙添發杜蔭沅攏勸馬石詳毆傷趙添發胸膛馬得亮馬二草包等亦將杜蔭沅毆傷各散蘇耀向倖坤發訴述倖坤發許俟開年再爲理講二十七年正月十三日倖坤發令羅起潰往邀馬成潰等前往評理適馬四銅錘在彼向斥多事羅起潰轉回告知倖坤發因回民遇事逞強起意糾毆洩忿遂向呂珍詳許成孝阮潮玉蘇耀商允倖

坤發令以回民阻水欺漢之言傳播闖眾分投
糾約呂珍詳等共糾得漢民羅起潰任連甲杜
潰阮汶詳李小四王士銀任東姚亭潰李萬胡
中潰戚小二王潮有潘趕年潘啞吧趙端工羅
起潞羅起沅蕭玉淋楊受淋及在逃之呂小平
春呂大眼睛許小老劉四鍋頭楊花松陳七劉
刁三徐老五等二十七人倖坤發亦糾約不識
姓名漢民三十餘人呂小平春等又轉糾得不
識姓名漢民二十餘人共八十餘人在禹王宮

會齊馬四銅錘聞知亦聚集回民桂小蘇馬得
亮馬二草包及在逃之白添發桂小鞍馬七馬
二花馬三存保馬老六張幅銀馬占鼃馬連沅
馬有淋馬有受馬大話張小五張老二白小喜
陳鐮刀並已死之馬小發甲馬小詳馬汶玉馬
占春馬洪發馬丁花子馬小萇受馬四塊瓦白
小八三馬正保馬尙平陳姓等三十一人並白
添發等所糾之不識姓名回民二十餘人共五
十餘人在清真寺防禦十八日上午倖坤發率

眾各持刀矛至清真寺地方喊罵馬四銅錘亦率眾執持刀標從寺內趕出彼此互鬪倖坤發將馬四銅錘並馬小發甲一併截傷羅起潰將馬小詳截傷白添發馬汶玉趕攏亦各將倖坤發羅起潰截傷姚亭潰亦將馬汶玉截傷均各倒地維時馬占春馬洪發馬丁花子陳姓並不識姓名回民二人各向任連甲杜潰阮汶詳李小四王士銀任東爭鬪被任連甲等各自截傷亦俱跌地與馬四銅錘等均各斃命李萬用矛

截傷不識姓名回民左胳膊該回民逃跑未斃
尙有回民馬小萇受馬四塊瓦馬小八三馬正
保馬尙平及不識姓名回民六人被何人致傷
身死彼時人眾勢雜各犯看視不明未能供指
餘回因力難抵敵往後退跑被漢民喊追倉猝
復自行跌宕斃命八九人呂珍詳許成孝阮潮
玉蘇耀胡中潰戚小二王潮有潘趕年潘陞肥
趙端工羅起深羅起沅蕭玉淋楊受淋等均止
在後助勢並未傷人嗣漢民等分路走散呂小

平春復帶同不識姓名漢民十餘人並邀張彩
張添幅陳七分追逃走各回呂小平春與張彩
路經新店房有回民何石甲等上前喊挈張彩
跑走何石甲之子何小科拔刀趕砍張彩轉身
奪獲回戳其胷殞命張添幅與陳七行至山
神廟被回民楊興發等攔住欲毆張添幅分辨
楊興發拔刀撲砍張添幅亦拔刀抵戳楊興發
閃避適其幼弟楊小老走攏致被張添幅誤傷
肚腹致斃張彩張添幅當各逃走呂小平春陳

七復帶人各將何石甲楊興發房屋打毀呂小
平春因傷斃回民多命起意燒屍滅迹希圖掩
飾遂令李小四胡中潰徐老五並不識姓名漢
民六人將各屍身檢齊共三十餘具連夜背至
清真寺院內搬取堆存柴草點燃將各屍燒燬
因火星被風吹落屋內草堆致將寺屋燃燒時
附近回民均因畏事躲避近寺房屋亦被燃燒
多間此漢回挾嫌互鬪傷斃回民多命燒屍燬
房之原委也旋據獲犯解省經委員等審明由

臬司招解臣等親提嚴鞫各供前情不諱臣等
以蘇耀等被馬成潰等毆傷係屬一時爭角何
以倖坤發事後扛幫輒爲鬩眾聚鬪恐另有起
衅別情並被糾被殺漢回亦恐不止此數其燬
屍燒房是否實係呂小平春起意有無因該犯
在逃扶同狡飾再三究詰僉供倖坤發原因邀
馬成潰等理講被馬四銅錘村斥挾忿並因回
民阻水與漢民本有未睦是以聽糾助毆委無
另起釁端至被糾漢民被殺回民實止此數其

燒屍滅迹委係呂小平春起意房屋係被延燒
並非故意燒燬不敢隱匿各供不移案無遁飾
查例載廣東等省糾眾互毆之案如審係械鬪
讎殺糾眾至四十人以上致斃彼造十命以上
首犯擬斬立決梟示其隨從下手傷重致死應
行擬抵者均各依本律例擬抵傷人及未傷人
者亦各按本律例分別治罪至彼造倉猝邀人
抵禦並非有心械鬪者仍照其毆本例科罪又
律載同謀共毆人致死下手致命傷重者絞監

候餘人杖一百又鬪毆殺人者不問手足他物
金刃並絞監候又因鬪毆而誤殺旁人者以鬪
殺論又例載回民結夥三人以上共毆之犯但
有一人執持器械者不分首從發雲貴兩廣極
邊烟瘴充軍又聚眾執持兇器傷人發邊遠充
軍又糾眾互毆案內餘人如有輾轉糾人數至
五人以上者無論曾否傷人卽照原謀律杖一
百流三千里又毆故殺人案內殘毀死屍其聽
從抬棄之人照棄屍爲從律杖一百徒三年各

等語此案漢民倖坤發因蘇耀被回民馬石詳
賒糖爭鬧馬成潰糾人將蘇耀毆傷事後往邀
理論並挾馬四銅錘村斥之嫌起意糾約八十
餘人持械互鬪致斃回民三十餘命該犯鬪殺
馬四銅錘馬小發甲二人實屬首惡非尋常互
毆可比例無治罪明文應比照廣東等省械鬪
讎殺糾眾至四十人以上致斃彼造十命以上
者首犯斬決梟示例擬斬立決梟示該犯已當
場被殺仍照例戮屍傳首犯事地方示眾羅起

潰任連甲杜潰阮汶詳李小四王士銀任東姚
亭潰各自鬪殺回民馬小詳馬占春馬洪發馬
丁花子陳姓馬汶玉並不識姓名回民等各一
命應仍照本律問擬除羅起潰已被戳斃應毋
庸議李小四聽從毀屍輕罪不議外任連甲杜
潰阮汶詳李小四王士銀任東姚亭潰均各依
鬪毆殺人者不問手足他物金刃並絞監候律
擬絞監候第聚眾持械非同尋常鬪毆且回民
之傷斃多命皆由該犯等助鬪濟惡所致情節

較重現當彈壓漢回滋事必須執法持平將兇
暴大加懲創此等鬪殺回民多命之犯按律俱
應情實未便日久稽誅致長囂陵惡習所有任
連甲等七犯應請

旨加擬立決俾各匪咸知儆戒亦足以折服回眾之
心漢民張彩張添幅於倖坤發等互鬪之時先
未到場後經呂小平春邀追逃走各回張彩被
回民何石甲等喊拏爭鬪致將何小科戳傷身
死應照鬪毆殺人律擬絞監候張添幅亦因被

回民楊興發等攔毆爭鬧致誤傷楊小老身死
應照因鬪毆而誤殺旁人以鬪殺論鬪殺者絞
監候律擬絞監候秋後處決漢民李萬聽糾用
矛戳傷不識姓名回民應照聚眾執持兇器傷
人例發邊遠充軍漢民呂珍詳許成孝阮潮玉
蘇耀訊止聽糾助勢並未傷人惟各輾轉糾約
五人以上應照互鬪案内餘人如有輾轉糾人
數至五人以上無論曾否傷人卽照原謀律杖
一百流三千里例各杖一百流三千里內呂珍

詳許成孝係在廠充當保長客長于倖埤發糾
眾爭鬪之時並不力爲勸阻輒聽從鬪眾糾約
致釀多命應請從重發新疆地方當差回民桂
小蘇等聽從馬四銅錘糾往抵禦並未傷人惟
先與回民馬得亮馬二草包馬石詳等聽從馬
成潰結夥持械將蘇耀等毆傷內馬成潰與馬
石詳等雖祖孫共犯惟係侵損於人應以凡人
首從論除馬成潰已在監病故外桂小蘇馬得
亮馬二草包馬石詳均應照回民結夥三人以

上其毆之犯但有一人執持器械者不分首從
發雲貴兩廣極邊烟瘴充軍例發雲貴兩廣極
邊烟瘴充軍與呂珍詳等各犯分別發配折責
安置漢民胡中瀆聽糾助勢並未傷人惟事後
聽從呂小平春燒屍滅迹應照毆故殺人案內
殘毀死屍聽從擡棄之人照棄屍爲從律杖一
百徒三年例杖一百徒三年定地充徒折責拘
役限滿詳釋漢民戚小二王潮有潘趕年潘啞
吧趙端工羅起深羅起沅蕭玉淋楊受淋訊止

在場助勢並未幫毆均應照其毆餘人律杖一百俱酌加枷號兩箇月滿日折責發落以示懲儆回民馬四銅錘糾眾互鬪並馬汶玉戡斃人命均罪有應得已各被殺身死俱毋庸議避害回民及被延燒回房已飭據該府廳妥爲招撫給資苦蓋均無失所該處泉水飭令仍照舊規漢回公同取用不得爭競廠地現俱靜謐除飭令該府廳隨時稽查約束務使漢回日久相安毋得稍滋釁隙並嚴緝逸犯呂小平春等務獲

究辦並全案供招咨部外謹將審明定擬緣由
合詞恭摺具

奏伏乞

皇上聖鑒勅部核覆施行謹

奏

姚州白井漢回互鬪大概情形摺

奏爲姚州與白鹽井相連地方漢回尋釁燒殺業
已彈壓解散現經獲犯審究並查勘辦理情形
恭摺奏祈

聖鑒事竊查姚州地方漢回雜處白鹽井在其境內
該州北界白塔街一帶係爲赴井通衢本年八
月十九日據署楚雄府寶俊楚雄協副將尙宗
慶轉據署姚州知州咸孚稟報八月十三日漢
民王開汶等因回民沙汶英藏頓軍器盤查爭

鬧致有殺傷漢回因此構衅于十五等曰在白
塔街等村互相燒殺當經會訊親往查辦稟請
派調官兵彈壓並據白鹽井提舉李承基稟報
聞有回匪欲與井民尋衅該井爲辦課重地恐
被騷擾請兵防堵各等情臣等當卽檄飭楚雄
府協隨帶弁兵并飭甫經出省之委員麗江府
裴聰順道前赴該處並檄調新授鶴麗鎮總兵
音德布護武定營參將王濤就近酌帶弁兵馳
往會同彈壓去後嗣據該鎮府協等查稟先經

府協前往彈壓飭令各掌教頭人曉以利害遍
爲傳諭並聞官兵前至遂經解散息爭惟肇衅
首要及逞兇各匪俱已竄匿現在嚴密緝拏務
獲究辦

臣林則徐於

奏委重綸署理普洱鎮總兵摺內業將姚州漢回
衅爭已息鶴麗鎮總兵音德布應須會同緝犯
尙駐姚州緣由陳明

聖鑒一面飭令該鎮府等確查起衅根由並漢回民
被燒房屋傷斃人數據實具報嚴拏首要各犯

認真審辦並將被害漢回妥爲撫卹勿任失所
茲據該鎮府暨委員等稟稱查因姚州回民喫
三竅馬幘良喫伊麼等諭知白井竈長漢民羅
晴川家道殷實商謀糾搶私將器械寄藏素好
之張汝淮陳典家內因在喫小雙茶鋪漏洩其
事被井民間知報經該提舉僉差將喫三竅並
張汝淮陳典等拏獲起獲刀械等件送署馬幘
良逃逸起意糾約回民報復卽令馬小班等運
送器械於八月十三日至白塔街回民沙汶英

家藏歃經該處漢民王開汶盤問爭鬧沙汶英之戚僕小老將王開汶戳傷身死漢民高添佑馬致禾等前往理論沙汶英恃強辱罵致相爭鬪高添佑等將僕小老戳斃並傷斃沙汶英家男女九命及不識姓名回民二人將其房屋打毀回民馬幗良等漢民高添佑等因此構衅附近漢回亦各隨聲附和于十五等日互相燒殺查勘白塔街洋派北關官屯等村漢民被燒房屋共二千六百八十餘間山腳官庄二村回民

被燒房屋共二百六十餘間漢民查報傷斃男
女三百二十七丁口內經獲屍驗明被殺被燒
及跌巖落水致斃者一百三十四丁口回民查
報傷斃男女六十五丁口內經獲屍驗明被殺
被燒致斃者二十二丁口此外並無屍身是否
尙有逃亡抑係查報不實現復逐處清查俟得
確數再行具報並聞白井關外回民亦有燒殺
之事該處僅住回民十餘戶均已搬避未據親
屬投報究被何人殺害致死幾人屍棄何處現

亦確切查訪俟得有端倪起屍驗辦計白井姚
州楚雄縣先後拏獲滋事回漢各匪僣三竅張
汝淮陳典馬棚良僣有盈馬春漢僣金聶倫馬
成名僣汶盈僣老抓馬玉山蕭小定僣新成馬
致禾胡小萬春李映祥僣世深僣世恩僣有功
楊旭僣小雙等二十二名並案內要犯僣伊麼
因指拏黨匪僣有盈白圖滅罪致被僣有盈砍
截斃命驗明屬實惟各犯供多狡展逸匪尙未
全獲現仍上緊偵緝嚴審務得確情錄供詳辦

被害者均已按戶撫恤逃避者陸續招徠安集
不致失所等情前來臣等查該漢回等因口角
衅爭輒敢糾眾互相燒殺以致傷斃多命燒燬
房屋多間實屬逞兇不法現查漢民被傷人命
多於回民十分之八漢民被燒房屋亦多於回
民十分之九雖其中互有曲直而回民之强悍
爲尤甚應將兩造首惡黨匪嚴行懲辦以昭炯
戒不敢稍任輕縱除飭將現獲各犯研審確供
並上緊嚴緝逸犯按名務獲歸案審辦另行按

擬具

奏外現在姚州地方俱已安靜白井照常煎銷仍
飭該鎮府及委員等妥爲查辦務使漢回日久
相安不得再滋釁隙所有武定營弁兵已徹歸
伍其音德布隨帶弁兵俟緝匪事竣亦卽撤回
謹將查勘辦理大概情形先行合詞恭摺具

奏伏乞

皇上聖鑒訓示謹

奏

甄別鹽提舉州縣各員摺

奏爲甄別昏庸謬妄及難勝民社各員請

旨分別革職勒休改敘以飭官方恭摺奏祈

聖鑒事竊維立政之道察吏爲先如其措置乖方識

見適形其闇汶聰明誤用心術每中於回邪又

或相率因循則公務必多廢弛臣等於接見屬

員時無不留心考察臣林則徐前於校閱營伍

之便並經到處訪聞據該管府州密稟前來臣

等督同司道詳加體訪查有白鹽井提舉李承

基人本平庸井地係其專管平時不理民事該民以煎鹽爲業家多殷實回匪因而恐嚇詐財若井民喊告到官卽爲分別查拏剖斷曲直立加懲創以儆其餘回匪定生畏懼乃聽井民膚受之懇輒令以原執被遂至倚官勢而報私仇追回民益肆囂陵卽架以謀逆重情請兵救護臣等就近發兵前往彈壓業經解散該提舉竟欲將回民剿殺殆盡妄作條陳又復私僱外來無業遊民作爲練丁幾至激成事變種種荒謬

罔知事體之重輕除案犯交府州拏解研審究
懲另摺奏

聞外應請將該提舉李承基先行革職如查有別項
情事及虧短經徵課項再行據實嚴參又嵩明
州知州黃際昌在任有年性耽翹蕘平時專恃
官親辦事故人皆得分肥前次領運京銅竟至
短交十餘萬斤現在查照例限追繳若仍令其
回任勢必至虧倉庫錢糧應卽勒令休致又署
邱北縣知縣黎崇基才屬中平該縣盜賊滋多

緝捕未能得力該署合性情疏懶難期振刷精神又署師宗縣知縣陳溶壤地與邱北毘連民夷雜處訟獄繁興該署合聽斷不勤捕務亦欠起色查黎崇基係進士出身現已准補麗江縣尙未令其赴任陳溶由拔貢教習期滿分發來滇補缺有需時日該二員年力強壯文理尙優應請均以敎職改補又候補直隸州州判山毓柏向多嗜好心地不醇舉動尤爲躁妄曾經署理廳縣不治輿情實屬聲名狼籍未便既往不

咎稍事姑容應請卽行革職謹就臣等見聞所
及核實

奏參此外查有庸劣之員再行糾劾斷不敢自甘
徇隱見好屬員有負邊圻

委任所遺白鹽井提舉員缺例應在外陞調麗江縣
缺滇省現有應補人員容臣等照例請補合併
陳明所有甄別緣由謹合詞恭摺具

奏伏祈

皇上聖鑒訓示謹

奏

飭提永昌京控人證未據報解情形片

再臣等因永昌漢回久挾夙讎互相殘殺終非了局要在彈壓之使不妄動化導之使不互疑是以仍留鎮將大員帶領未撤官兵駐彼防範竝飭迤西道親歷永順一帶督同府縣曉諭紳衿掌教務敦和睦永禁侵陵疊次刊發告示誼誼開導令其各具切結以漢保回以回保漢又爲之清釐田產招復流亡使知相安則樂利有餘相讎則身家兩失其紳衿掌教等亦卽轉相

勸戒議立條規不獨具結呈官且各書和約同
誓於神以明其無反覆臣等接據文武稟報亦
卽優加獎賞以誘其悔過遷善之誠竊冀自茲
以後兵革可以不興卽留防各兵亦惟盡此殘
冬皆可徹回歸伍惟先有兩起回民京控欽奉
諭旨交臣等審辦其原告丁燦廷等一起於十月十
七日由部咨解到滇又杜文秀等一起亦於十
一月初三日咨到應卽飭提被告人證解省以
憑質訊惟查原呈所列被證自百餘名至二百

餘名不等人數太多勢難盡行提解當經札飭該道府等分別首要次要其於控案情節無甚關係者祇須就地取供彙送覈辦惟被回民呈內指係香匪串謀滅殺無辜者不能不提至省城與原告質對虛實乃歷今多日總未解到雖因永昌距省寫遠難免遷延而訪聞該處漢民業已糾聚匪徒將應解之人意圖抗匿藉稱本年正月內該處有問擬軍罪之張杰萬重二名由官起解被回匪攔路殺死此次若解赴省亦

必在途被害不敢起身該道等諭以揀派文武
幹員多帶兵役沿途護送務保無虞開導再三
而哨民總不願解查該處爲保山縣所轄地分
七哨南三哨尙可理喻其北四哨强悍成風就
中金鷄板橋二哨尤多匪徒燒香結會風聞十
餘年來往往挾讎擅殺平民匿不報官若官爲
查問則沿村吹號糾人每欲恃眾困辱官長地
方官恐急則生變致蹈辦理不善之愆因而隱
忍彌縫但冀事端寢息養癰本非一日積習殊

可深憂前者漢回構釁猶祇民與民爲讎今明知京控兩案奉

旨交審而膽敢糾約庇匿意欲抗官此風實不可長
惟該道府均未將情形具稟臣等馳系轉深現
又諄飭妥爲曉諭設法提解固不可操之過促
致滋決裂之虞亦不得匿不稟聞轉釀邊隅之
患所有提解控案未能就緒情形臣等謹據實
附片奏

聞伏乞

聖鑒謹

奏

籌辦永昌哨匪起程日期摺

奏爲保山縣七哨匪徒打奪解省人證隨又焚燒
縣署劫放獄囚殘殺城內回民及在官丁役鎮
道府縣現俱被困在城道路梗塞文報沈滯不
得不調兵剿辦臣林則徐擬赴大理府就近調
度仍先出示散其黨羽以冀首要各犯作速就
擒地方仍歸綏靜謹將籌辦情形恭摺奏祈

聖鑒事竊臣等前因永昌回民兩起京控欽奉

諭旨交審飭提被告人證解省日久未見解到訪聞

該處漢民欲將應解之人抗匿不解而未據該道府具稟永昌距省十九站當又疊札飭查竝將所訪大略情形於上年十二月十六日合詞附片具

奏在案嗣經查據保山鄰境各文武先後探報十一月二十九日永昌府縣會營帶兵押解京控案內被證至離城四十里之官坡被保山哨民劫去次日又擁入城內焚燒保山縣署監犯盡行放出先經招復之回民現被搜殺無存沿途

哨民聚集阻塞道路搜檢公文凡有關係之件均不能遞送江橋板片已被折去各等情迨十二月二十五日始接據該處鎮道及府縣營員會稟則稱十二月初一日起解京控人證周曰庠等九名行至官坡因聞前途有回匪聚眾圖搶該被證等恐被殺害哭求緩解是日街期眾民紛紛跪求因人多擁擠周曰庠等走散旋報城內回民放火延燒縣署監獄漢民救火匪回齊出搶殺被兵練格殺多命監犯亦乘間逸出

等語臣等查保山城內文報業已多日不通而此次鎮道府縣等會稟忽然同日遞到其詞又皆畫一而核與鄰境文武所報情節大相懸殊此中愈多疑竇當復疊遣弁兵差役分投飛探竝查有由保山逃出之腳夫數人陸續傳訊始知該處七哨匪徒不下數十萬人每聚眾時用牛角一吹無不蜂擁而至此次打奪京控人證實係十一月二十九日之事其時文武帶領兵役雖有數百名無如哨匪累萬趕來鎗礮亂放

有騰越鎮標外委胡恩榮左臂被礮子打穿存
亡未卜各文員乘坐之轎俱被打碎武員軍械
馬匹被奪一空其次日卽係十二月初一日各
文武正在會議辦理此案未開城門忽有無數
哨匪越城擁進聲稱搜殺回匪查保山城內有
甫經由官招復之回民百餘人逃赴縣署聲喊
救命該哨匪遂追趕至縣一齊放火將縣署全
行燒燬回民盡行殺斃竝有騰越廳回民來府
應試亦被殺多名又以各衙門及公館有回子

藏匿恃眾搜殺竝將迤西道之家丁誤認爲回人殺死二名其赴縣監放囚之時有縣役張五攔阻亦被殺害所有在城文武隨帶丁役無多其永昌協兵丁亦係該處之人勢難恃其捍衛自鎮道府縣以及各委員皆被困窘在城每日市糧限數出糶該處有瀾滄江一道爲省城及東路各屬赴永必由之路該哨匪將江橋板片折去並聚多人把守如有公文遞過哨匪卽攔截折看立時撕毀永平縣遣遞公文差役亦被

殺死二人其餘各處隘口均被匪黨把守無人
得入是以臣等節次飭查各文件俱無下落其
忽然遞省之會稟卽係哨匪捏就情詞逼令書
吏繕寫勒官用印發申而其實在真情除鄰境
探報及臣等查訊之外全不得信查該處哨匪
如此不法雖尙未聞戕害各官而抗拒勒逼情
形卽與反叛何異推其藐法之由聞自道光十
三年間該處設立牛叢挾仇擅殺經署永昌府
陳錫熊署保山縣吳繩先後親往查禁均被圍

困窘辱勒令寫立不辦字據用印給付爲憑始
行放出其事竟已寢息嗣後該處之民直皆目
無官長前兩年該哨與回結衅互相焚殺厥罪
惟均祇因回匪有拒敵大兵戕官劫囚等事是
以用兵專爲剿回而設其哨民尙無抗官情罪
故未加兵今逆情如此昭彰直欲負隅梗化若
再化大爲小不獨永昌竟成域外而凡漢回匪
類孰不恃居邊遠羣起效尤臣等與司道各員
再三商酌竝查知回民現亦四處糾黨各圖報

復若再互相殘殺禍患更必蔓延須得多調重
兵方足以示彈壓而資剿辦查七哨有數十萬
之眾兵力單弱深恐損威其永昌順雲一帶之
兵旣因要隘甚多難以分撥且須防其勾結必
得另調他處之兵是以札商提臣榮玉材先於
提標及維西永北鶴麗劍川景蒙等營調兵約
二千餘名爲前隊一起交榮玉材帶領先赴永
平駐劄相機前進又調省標六營及曲昌開化
各兵約二千名爲中隊一起赴大理聽候調遣

又調昭通東川兵七百名令昭通鎮劉定選統帶竝調貴州提標及威甯安義二鎮兵共一千二百名交安義鎮總兵秦鍾英統帶爲後路一起陸續進發以上約調兵六千名皆由東路前往其永昌以西有騰越龍鄰一鎮一協之兵亦經酌調二千名由西路前進以期夾擊復查厯次迤西用兵無不添僱勇練該處山川險阻箐密林深客兵路徑生疏易滋迷誤須用慣習山路之士民夷練或指引嚮導或分截要隘兼杜

匪徒竄伏以防意外之虞臣等亦已分飭各土
司僱備精練並札該管府營認真挑選以資應
用但查永昌之瀾滄江兩岸皆依山爲險路極
彎曲江橋一座爲往來咽喉要路今經該匪折
去橋板聚眾防守恐此路未易進兵若不得已
則各處官兵均須繞道順甯府前進臣等分檄
經過各地方預爲佈置已有眉目計各路官兵
正月底可以到齊臣林則徐擬於十九日由省
起身赴大理府駐劄督辦該處距省城十三站

距永昌六站自可隨時相度機宜分別調度臣
程喬采仍在省城督催各路官兵籌辦糧餉接
濟所有總督衙門日行事件暫委藩司趙光祖
代折代行其緊要事宜仍包封寄至行次由臣
核辦至軍需應用經費查滇省別無閒款可籌
祇得於鹽課項下借動銀十萬兩先行濟用惟
目前哨匪聯爲一氣良莠不分若概予征剿恐
脅從者自知不免亦復相率抵敵礙難辦理是
以臣等先行剴切出示遍貼曉諭以附近各邨

漢民如不敢隨同附和定不概予株連卽先已
被脅勉從者但能悔罪輸誠亦可量邀末減其
心存畏懼不敢始終怙惡須將首要各犯迅速
自行縛獻以正刑誅所有江橋板片亟須照舊
鋪平各處隘口不許阻攔行旅往來文報毋得
截留撕毀被搶軍械作速照數繳還以上各事
如果逐一遵行或可網開一面免致盡數殲除
若仍冥頑不靈罔知利害則大兵一臨惟有痛
加勦洗人皆粉骨碎身地盡犁庭掃穴不能曲

予保全如此大加曉諭庶黨羽可漸解散元惡
易就殲擒臣等惟有極力籌維冀地方速歸安
謐以仰副

聖主綏靖邊隅除莠安良之至意所有查明哨匪滋
事調兵辦理緣由謹合詞恭摺具

奏伏乞

皇上聖鑒訓示再滇省程途遙遠差弁齎摺約須四
十日始能到京臣等恐塵

聖懷嗣後軍務之摺卽請由馬上飛遞合併聲明謹

奏

生擒彌渡匪犯審辦摺

奏爲彌渡軍營生擒首要重犯審明卽行正法餘犯按例定擬恭摺奏祈

聖鑒事竊照彌渡地方內外匪徒勾結滋事傷官害民經臣會督提鎮用兵剿辦大獲勝仗除臨陣殲殺情形已於另摺

奏報外所有官兵在陣前生擒拒敵逆匪及先後逸出被獲各犯陸續解送到臣者計共一百一十三名當經飭調大理府知府唐惇培督同署

雲南縣知縣董宗超署賓川州知州李崢嶸暨
各委員訊取確供復經臣逐一提審除訊明實
未隨同拒敵傷官結會拜盟焚殺搶刦之黃小
裸等三十五名分別取保省釋及遞解本籍管
束外臣核訊通案眾供此次外來匪徒係四川
國民沙金隴沙玉隴漢民古明發爲首本地匪
徒係回民麻汝淮麻春融黃中爲首緣彌渡地
方爲迤西買賣馬頭常有川陝漢回民人往來
販賣因地方頗稱富庶往往流連不去易生事

端道光二十七年秋冬間沙金隴沙玉隴弟兄
與古明發等先後販彌渡雜貨生理遂與本地
素稱強梁之回民麻汝淮等交好十二月間沙
金隴等見陝西人喬姓在彌渡開義盛當舖銀
錢充積起意訛索終日在鋪吵鬧麻汝淮等遂
勸鋪夥李六等出錢買靜陸續詐去錢二百二
十千銀二十兩寢事本年正月初九日有川省
回民張國幅與軍犯張世保私相賭博爭毆張
國幅被張世保戳死報經署彌渡通判林甘源

移明趙州知州周力墉到地驗屍拘獲張世保
到官正在研訊詎沙金隴等藉稱死者係其親
戚乃被軍犯欺侮遂約川回多人執持刀械於
十四日將各軍犯住處搶奪一空該通判會同
知州差人禁止沙金隴等卽闖入通判衙門將
甫經拘訊之張世保擅行戳死竝另弊在旁軍
犯陳亞林一名帶傷四名官差喊拏立時聞散
因匪類人眾一時難以就獲其內匪麻汝淮等
又起意恐嚇市肆民家聲言四處外來人若不

安頓卽日必被焚搶各戶無不驚懼逐日鳩集銀三百二十兩由麻汝淮等交沙金隴沙玉隴古明發分散夥眾作爲盤纏口許一二日卽各回籍麻汝淮等分其餘利多寡不一乃沙金隴等因見良懦可欺口雖言去實無去志愈圖搜劫城鄉各戶更可捆載而歸猶恐人心不齊起意結盟拜會先與外來客民密約得贓均分又暗邀本地回民麻汝淮等輾轉糾人亦動以利十八日在彌渡北門外之五顯宮燒香結拜歃

血飲酒謂之進山其入會之人約分九排皆有
總領曰大爺曰二爺曰五爺曰么大曰滿大曰
滿五曰十爺曰么五曰小老古明發麻汝淮與
沙金隴沙玉隴麻春融黃中均列排首總其六
七百人十九日會畢謂之出山經通判知州訪
知差拏因人眾不敢動手趕緊稟請發兵惟時
北門外鄉民恐被侵擾各自團練保護二十日
該匪等各備馬匹揚言是日起身旋即藉稱四
鄉持械堵截不能前去實則已與盟夥暗定時

刻分隊出搶一時鎗礮刀械紛紛突起戶民動
遭殺害驚惶失措不敢禦敵有李姓一家被搶
銀五千兩陳姓一家被搶銀二千四百兩爲數
最多其餘搶銀自四百餘兩至數十兩不等錢
自百餘千至數千不等該文武在街市禁阻寡
不敵眾致各受傷該匪等遂恃人眾圍攻通判
衙署各官被困署中請兵未到二十一日燒搶
寺坡北甲等處二十二日燒搶陸家賴家等營
二十三日又燒搶阜角馬溪姚期等營共計被

害者十七邨莊至二十四日兵雖未齊而將備
已有到者一面派兵堵禦匪類稍有懼心不敢
再行放火二十八九兩日兵到漸齊其次日提
鎮俱到初二日紮營兜捕初三日併力正攻該
匪恃眾抗拒竭盡晝夜之力殺斬無算生擒復
多此係內外匪徒始而詐擾繼而結拜終而焚
搶戕官害民之一切情形也此次沙金隴一犯
於初三日當場騎馬拒敵經各兵民認明連槍
打落奪獲其馬斬取首級送至大營各邨人眾

來觀齊聲稱快除將該首級懸竿標明示眾外
現所生獲之外匪首犯古明發內匪首犯麻汝
淮二名均已供認起意會商糾眾拜盟復率領
焚搶邨寨殺害多人拒敵官兵各情不諱均屬
首惡應比照凡謀叛不分首從皆斬律加重凌
遲處死惟係比照定罪家屬毋庸緣坐財產亦
免入官稍示區別曾義松劉得畏謝申華陳有
何馬明楊老三趙添成七犯均供認殺人自七
命至二命不等并經拒敵官兵又唐汶星徐兆

近李添朝楊應全李發褚興趙洪順黑正青趙
斯樽馬潮選馬連興王大順侯小六王春陳泳
盛劉思潮李諱劉仍馬成母受復尹小存徐崇
尹時有羅從潰李選揚潘有受二十六犯供認
焚燒邨寨各殺一命俱屬同惡相濟均應擬斬
立決加以梟示馬青山李洪順曾世桂黃明富
李添希楊明陳世汰劉逢春馬保李發春祁永
林張老蔡連沅趙鄭桂楊義隴劉金寶王結馬
信馬沅唐小四高順才徐廣順但意才楊正興

李昭劉定嶠二十七犯雖供未經殺人俱已隨同焚搶邨寨得分贓物均應擬斬立決以上共犯六十二名悉係情罪重大未便稍稽顯戮臣於審明後卽恭請

王命飭委大理府知府唐愷培新習營遊擊恒權押赴犯事地方卽行處決應梟示者傳首示眾以昭炯戒其獲時受傷較重旋經監弊匪犯八名內有李泳發楊興順二名殺害多命應行戮屍一體梟示又楊沅方有潮馬靛青鄧奉茂王保

罄馬小沅祁得陳沅陳聯升馬章馬潰郭遇順
馬仍馬吉桂楊長保李老二官相潮鄒正才十
八犯訊只隨同入會竝未焚殺搶奪亦無抗拒
官兵均應照匪黨結拜非依齒序聚至四十人
以上爲從發極邊烟瘴充軍例發極邊烟瘴充
軍係在滇省犯事應請照案發配兩廣安置又
據現犯供稱沙玉隴麻春融黃中三犯已在陣
前殲斃惟屍身未經認明恐難憑信尙須確加
查究如經竄逸尤須查拏務獲不任倖逃法網

至_臣現駐行營未及辦理供招送部謹開具犯
名清單註明緊要情節恭呈

御覽仍將各犯口供發交臬司彙核詳送撫_臣咨部
備案以符定制再該匪等結會拜盟事起倉猝
地方官查知禁止而寡不敵眾是以稟請發兵
現已剿辦完竣所有失察處分仰懇

天恩從寬邀免謹將訊明辦理緣由繕摺具

奏伏乞

皇上聖鑒謹

奏

續獲彌渡匪犯審辦摺

奏爲續獲彌渡滋事逸犯審明定擬竝將重犯卽行正法以示懲儆恭摺奏祈

聖鑒事竊臣前因彌渡地方內外匪徒滋事當卽調

集官兵殲獲首從各犯分別懲辦業經繕摺

奏報竝聲明飭屬查拏逸犯務獲在案臣思除惡

務盡逸犯一名不獲根株一日不清況此案夥

黨多係川陝外來匪徒如閤時稍久誠恐出省遠颺查緝更難得手隨卽通飭各府廳州縣毋

分畛域勒限上緊偵緝竝於毗連各屬關隘嚴飭認真盤詰務期按名弋獲不任免脫稽誅茲據蒙化賓川姚州雲南等廳州縣陸續拏獲首從各犯共計二十二名解送到臣當飭大理府知府唐煊培督同署太和縣知縣熊家彥署賓川州知州李崢嶸暨各委員訊取確供復經臣飭提親訊據首犯沙玉隴供認與已正法之古明發麻汝淮竝殲斃之沙金隴等起意糾約四川陝西貴州及趙州永北姚州各處漢回結盟

焚搶抗拒官兵殺斃多命乘間逃逸各情歷歷如繪核與古明發麻汝淮等前供悉相昭合復提從犯隔別研訊除陳興順一犯聽從結盟竝未隨同焚搶孫小滌白萬明二犯係事後分贓未經拜盟外其馬六三等十八犯各供認聽糾結盟持械焚劫並有打仗一二次殺斃一二三命至三四命不等臣恐尙有不實不盡復提前獲留禁各犯質認無異再三究詰矢口不移案無遁飾查沙玉隴商同古明發等糾眾拜盟身

爲會首復率領焚搶邨寨殺害多人拒敵官兵
實屬罪大惡極應請比照凡謀叛不分首從皆
斬律加重凌遲處死案係比照問擬應免緣坐
馬六三謝洸沅李阿存周其湮鍾小三楊順六
犯係聽從結盟搶劫得贓拒敵官兵殺斃一二
命至四命不等同惡相濟均應擬斬立決加以
梟示王有才劉玉順趙起倡韓成富潘應發張
騰高彭興順宋洪發陳常發胡春華楊啓濬周
濠十二犯雖未經殺人但隨同結盟焚搶得贓

竝抗拒官兵均應擬斬立決以上十八犯俱屬
情罪重大未便稍稍顯戮臣於審明後卽恭請
王命飭委文武員弁將各犯押赴市曹卽行處決以
昭炯戒而快人心應梟示者仍傳首示眾又陳
興順一名訊係聽從結盟並未隨同焚搶應照
匪黨結拜非依齒序聚至四十人以上爲從例
發極邊烟瘴充軍孫小滌白萬明二犯委係事
後分贓未經拜盟應照強盜事後分贓例杖一
百徒三年臣現由大理前赴永昌未及辦理供

招謹開具犯名清單註明情罪恭呈

御覽所有各犯口供仍行發交臬司歸案彙核詳送
撫臣咨部備案至緝獲逸犯各文武均尙認真
容查明首獲協獲與前案一併奏請鼓勵合併
聲明所有續獲逸犯審辦緣由理合恭摺具

奏伏乞

皇上聖鑒謹

奏

保山哨匪輸誠獻犯仍飭嚴拏摺

奏爲保山七哨懾服軍威已縛獻匪犯多名解臣
審辦仍飭各官兵兜圍嚴拏務令滋事案犯全
無漏網以示懲創而靖地方恭摺奏祈

聖鑒事竊臣前於二月十二日由驛

奏報先剿彌渡匪類情形竝查知保山自發告示
之後江橋已鋪板片文報不敢阻留卽於摺末
聲明冀以仰紓

宸念隨卽催兵移營分路前赴永昌臣亦將續獲彌

渡案內逸犯二十二名在大理府復行審辦於
二月二十一日又經專差齎摺具

奏在案因思大理距永昌尙有六站雖比省城爲
近而軍情信息究不能早晚常通查永平縣爲
永昌出入咽喉前聞哨匪滋鬧之時回匪亦借
報復爲由盤距永平一帶將往來貨馱強劫勒
贖以致客商絕迹且糾搶居民財物擄占婦女
靡惡不爲是以臣復由大理移駐永平旣督人
哨之官兵並辦行劫之回匪自永昌文報通後

在城文武各員均不至如前被困隨據該鎮道等先後具稟以哨匪傳聞此次所調兵練特多又聞彌渡用兵殲殺無算始有悔懼之心城鄉紳士耆民近日漸出見官據稱先因哨匪人眾勢兇一時難以理論所以不敢出頭迨接奉省城發出告示知征剿匪類之中仍寓綏輯平民之意伊等幸獲生路亟與各哨逐加講解咸知凜畏兵威只求遵示辦理所有案內匪犯責令各處里甲約長均卽確查縛送橋板鋪平之後

不獨行人與文報全無稽留大兵到時亦必進不敢稍阻又放出縣監囚犯自行遍處覓獲仍送回監現查僅少一犯當再購線找尋其在官坡搶去軍械亦已繳還十之七八仍在各哨查追呈繳又縣署業已被燬惟求准民捐蓋不敢稽延等語臣以衙門爲法令所從出頑民膽敢焚署誅之尙不足蔽辜若准賠修竟似興廢自由成何政體嚴批駁斥不准惟匪犯速行縛獻以正刑誅庶免盡行剷洗之語係前經臣等

奏明出示曉諭自未便頓改前言但所獻必以首
要爲先不得就輕避重且以時日爲限不得延
喘緩兵如敢詭詐相嘗立即殄除務盡臣又札
調久駐該城之迤西道王發越面問情形據稱
該處士民均悔罪輸誠屬實並因鶴麗鎮音德
布連年在永昌用兵民情素相敬憚先令帶兵
由江橋直入見該處男婦老幼焚香跪迎沿途
不絕籲求網開一面准予緝匪送官該鎮遂與
先駐城內之騰越鎮總兵拴住率同府縣查收

所獻匪徒維時雲南提督榮玉材與昭通鎮總兵劉定選貴州安義鎮總兵秦鍾英先後各率將領備弁分路齊進其民人之焚香跪迎者亦與音德布到時無異凡該處城鄉大路無不壁壘帀地旌旗蔽空赫赫萬軍使民戰栗又永昌與順甯連界以右甸爲緊要關鍵查臨元鎮總兵李能臣前本派在順甯留防此次仍令帶兵約一千名在右甸紮營以資策應聲勢極爲聯絡節據音德布等稟報獻出匪犯截至三月初

五日已及一百三十餘名經府縣訊取初供其承認傳帖糾人抗官打奪入城焚署殺人放囚之犯已覺實繁有徒臣將回民兩次京控原呈所開被告名單與現獲之犯互相核對如劉書卽劉一鵬周曰庠張時重卽張重李國卽李兆祥萬益三劉文華楊春富張文儒董俊吳少游周際岐宋發春藍得沛石鈺卽石育吳堃等本皆被告有名而劉書周曰庠則尤控單所首列者此外或一人而有兩名亦所難定飭詢永昌

府縣有無頂替冒名據復提犯互相認識所獲
實皆本人等語當卽飭令分起解至永平容
督同委員細加研審分別懲辦伏思該地方既
於兵到時卽先投誠獻犯自未便遽加剿擊致
使玉石俱焚惟竟以所獻爲憑則袒庇卽在意
中藏匿亦復不免且愈是首要之犯愈恐徇隱
者多當此兵威極盛之時搜緝尙非難事除仍
勒催多獻真犯外臣復明查暗訪且多遣文武
員弁確探未獲匪蹤竝向已經獲案之犯問係

何人糾約何人協同令其自相攻擠彼既身遭
縛獻如有罪同法異者諒必不肯甘心如此逐
節推求若一哨中實有隱匿罪人卽當分兵圍
拏倘敢負固不服則是孽由自取定予剿洗無
遺不敢姑息因循致貽後患除俟續獲案犯並
審明定擬緣由另行馳

奏外所有現在縛獻多犯情形

臣

謹會同雲南巡

撫

臣程喬采提督

臣

榮玉材合詞恭摺由驛具

奏伏乞

皇上聖鑒訓示謹

奏

覆奏永昌漢回情形片

再臣正在封摺時適值齎摺差回承准軍機大

臣字寄本年正月二十五日奉

上諭林則徐等奏提解控案延未赴解等語此風斷
不可長著林則徐等諄飭該道府等妥爲曉諭固
不可操之過促致滋決裂亦斷不能任其抗拒不
遵提訊總須默化潛移挽回風氣以綏邊徼而靖
兇頑等因欽此又由兵部限行四百里承准

廷寄二月十七日奉

上諭林則徐等奏保山縣七哨匪徒打奪解省人證
隨又焚燒縣署殘殺城內回民現在籌辦情形一
摺必應痛加剿洗方足挽回積習林則徐現已檄
調各營精兵分股進剿竝已親往大理府督辦榮
玉材業經帶兵前往務當籌畫萬全操必勝之權
相機攻剿固當分別良莠不可妄殺無辜致失眾
心尤不可再示姑容稍留餘孽總期一鼓作氣悉
數殲除方足大昭懲創所稱鎮道府縣皆被困窘
在城每日市糧限數出糴現在曾否解圍該鎮道

等如何著落著卽查明由驛具奏其瀾滄江爲赴
永昌必由之路江橋板片現被匪等折斷聚眾把
守尤當迅速設法擊散賊眾修復橋道鐵索俾文
報得通剿辦方能得力至軍需經費除於鹽課項
下借動十萬兩外所有雲南貴州兩省現收捐輸
之款並准其先行動支以濟急需程爾采在省督
催各路官兵籌辦糧餉俱當悉心商辦務使兵威
遠振漢回各匪盡皆懾服斷不可稍有挫失以靖
邊圉而除兇頑是爲至要將此由四百里各諭令

知之欽此竝發回 臣前奏摺一件奉

硃批此摺卽應由驛馳奏何待嗣後另有旨欽此 臣

在永平奉到跪誦再三仰見

聖主廑念邊疆務令遠振兵威漢回盡皆懾服 臣等

得以遵循辦理感悚彌深除保山城市及瀾滄

江橋情形已於正摺縷陳外查提 臣榮玉材先

於保山之官坡地方紮營會督各鎮將備弁查

拏匪犯撫 臣程裔采早將各路官兵全催過省

臣謹再行咨會一體欽遵辦理斷不敢稍有挫

失至軍需經費目前不能不用而實無款可籌
仰蒙

恩准於兩省現收捐輸款內先行動支臣等倍深感
激惟有極力撙節絲毫不許虛糜並隨時察看
情形若可徹兵卽行酌量先徹以歸節省再
恭繹

諭旨務使漢回各匪盡皆懾服尤仰見
聖主洞燭情形持平

訓諭之至意

臣

察看迤西風氣漢民惟保山七哨最

爲桀驚其餘尙近瀉樸回民則無處不有且良
善少而梗頑多卽如永平所轄之曲碕等回莊
無非聚而爲盜且因去二十五年九月保山城
內漢民殺回一事人人影射自稱難回無論客
貨官鹽攔搶到手非贖卽賣一拏到官則稱被
難之餘無可謀生不得不向客商索借度日一
似情有可原其實此等多非保山回子卽籍隸
保山亦多分往各寨不皆城內被殺之家就使
原先真是難回而旣如此行爲直成流賊豈可

復行曲貸自臣駐劄永平以來趁保山兵力正

多因已縛獻犯人尙未剿擊之際訪有回匪聚
搶及受害民人告發卽先派兵密往掩捕計旬
日間亦已獲犯一百名有零容當陸續審辦並
救出被擄婦女數口先行給親完聚餘匪竄逸
何處亦經嚴飭各地方官確切偵探會合兜擒
但各處回莊通氣者多每以庇護同教爲名而
以窩盜分贓爲實非重懲數處難挽積慣頽風
此次臣調兵較多固爲哨匪恃眾逞頑而設亦

因迤西久爲盜藪非重辦無以掃清卽使哨匪
辦完亦擬乘勢會督提鎮擇其要害壓以重兵
責令頭人指名縛獻果能盡將匪類獻出以正
刑誅無論足漢是回皆准一體辦理總使剷除
根莠保衛善良以期邊圉肅清稍副

恩慈委任謹會同提臣撫臣繕片附
奏伏乞

聖鑒訓示謹

奏

審辦倡亂妖匪金混秋摺

奏爲密訪保山滋事根由竝研訊犯供究出賊眾
倡亂之妖匪金混秋卽鐵帽子拏獲審明恭請
王命從重凌遲處死以昭炯戒而絕禍源恭摺奏祈
聖鑒事竊臣前由大理移駐永平督兵進剿保山七
哨因其畏威懾服縛獻匪犯多名當將飭提解
審仍令官兵兜拏緣由於三月初八日恭摺由
驛奏

聞在案

臣

思該處民風固屬强悍然果何所倚恃而

竟敢於打奪人證之後又公然進城焚署殺人
劫囚恐另有荒誕不經之徒從中煽惑以致不
顧性命不畏兵刑狂悖兇殘至於此極當經密
派精細諳練之委員數人改妝暗訪知哨匪所
恃爲護符者有一種緊皮藥若與人戰鬪先服
此藥可以倍加勇力兇很直前卽刀槍亦能抵
擋其造傳此藥之人混名鐵帽子厯在邊地往
來此案滋事爲首之人與之潛相勾結屬實隨
獲到倡謀聚眾之已革文武生沈振達張時重

張汶儒詳細訊究來歷據沈振達等僉供鐵帽
子實名金混秋係大理府屬猓夷因遊方賣藥
常戴鐵盔鄉人呼爲鐵帽子沈振達之義父沈
聚成原籍湖南在保山之金雞邨寄居早年赴
銅廠營生被磚碯坍塌壓傷頭項經金混秋用
草藥醫痊遂拜金混秋爲師傳其緊皮方藥沈
振達從幼見過金混秋稱爲大太爺道光二十
五年五月間保山漢回構釁回眾攻打金雞邨
該邨咸推沈聚成爲練頭率帶練丁堵禦沈聚

成將金混秋所傳緊皮方藥配給眾練丁服食
竝稱其藥曾經念呪畫符食後皮肉縮聚刀砍
不進槍打不透以壯眾丁之膽嗣果殺退回眾
將最爲著名之回匪九坎毛戕斃眾皆歸功於
沈聚成懇其長爲地方保護沈振達見伊義父
年逾六十素患哮喘病證且係目不識丁知其
本無能爲伊遂乘此機緣武斷鄉曲思及金混
秋既有術呪法符自不止製造緊皮藥一端因
潛往土司地面尋見金混秋要傳各種邪術金

混秋告以有銅贏子一個念呪騎上能駕雲霧
飛行又有天印一顆印在紙上佩帶身邊刀槍
不入竝能招調陰兵可敵千軍萬馬其他打仗
防身之物尙有多種沈振達聞其法術以爲可
恃益加崇信二十七年十月內聞回民京控要
提人證解省審辦沈振達知伊義父沈聚成被
控有名恐其解省喫虧與張時重張汶儒等商
謀阻解找尋金混秋請其卜卦金混秋用竹片
火炭打卦稱係上吉可以攔阻不必解省沈聚

成遂往山裏藏匿沈振達等倡言官府如果要
解只得拚出大鬧一場維時金混秋潛住保山
之睡佛寺內沈振達等密與往來經該府縣風
聞將金混秋驅逐出境沈振達等又遣萬鐸傳
贊趕往途次截留金混秋到金雞邨同住商用
各種邪法竝蓋造陰兵臺一座至本年二月大
兵將到始行躲散等情臣查現在保山境內四
面皆有官兵紮圍該犯金混秋斷不能遠颺出
境轉恐匿在近處使人不覺當卽密委素能緝

捕之臣標千總施嘉祥帶兵數十名馳往查緝

該千總探知金混秋寄匿保山城南蕭祠其隨

帶護身八人皆有過人膂力若遽行動手恐致

走脫密稟提臣榮玉材添員協拏適榮玉材之

子兵部額外主事桂恆厯隨伊父出師住在營

盤卽與榮玉材添派之游擊王夢麟護遊擊陳

得功把總張慶曾密至蕭祠外面施嘉祥將所

帶各兵前後佈置時已昏夜桂恆扮作過客進

祠尋見金混秋託言央請打卦攔其出路施嘉

祥卽乘機上前將其擒獲王夢麟陳得功張慶
曾均協同緝縛該匪所帶之三帕等八人正欲
抗奪亦被施嘉祥等合力圍擒無一得脫榮玉
材竝卽知會各文武勘明金混秋隨身行李物
件逐一封貯解送到臣當卽查驗有緬字經卷
五束緬佛一尊念珠一串鐵帽銅帽各一頂銅
贏一個約二寸許鳥槍七桿火藥一包又有藥
礮藥葫蘆各一箇內裝藥物或名緬茄或名飛
芋與白胡椒雜貯卽係配製緊皮藥之用復有

木印一顆分刻漢文夷字其漢文曰猛砮天下
夷字譯係祖師余額發佛塔等字此外尙無違
禁物件字迹臣隨卽親提該犯金混秋卽鐵帽
子督同迤西道王發越等嚴訊據供年五十六
歲祖上本係擺夷故父余額發住居鄧川州我
在該州生長二十歲時拜從口外野夷金老蚌
雞爲師便從他姓金學習符呪配緊皮藥尋能
醫跌打損傷在邊地各處游方住居無定因沈
聚成曾在銅廠被石壓傷爲之醫治痊愈沈聚

成拜我爲師傳授方藥伊義子沈振達亦相熟
識道光二十七年十月間沈振達尋我占卦說
伊義父與永昌城哨多人怕被回子京控恐要
起解上省能否攔阻我想此案人數甚眾正可
哄騙取財告以卦象甚吉攔阻無防那時保山
地方漢回卻無爭鬪我遂住在睡佛寺內十一
月中沈振達常來看望私言伊義父沈聚成雖
已入山遠避而同案之人不日起解恐伊義父
將來亦不得饒不如先將頭起奔回後起卽俱

不解若鬧出亂來專靠大太爺法術答救保護
之語諂諂密託我想向來金雞等邨人最強悍
一呼數萬諒必不致喫虧我若不壯其膽則向
來所誇法術反見是假非真因面許以若要陰
兵我能調集數萬但必須預先建立清淨屋宇
大家焚香禮拜捨錢祈福乃更有靈又言永昌
流年風水不利尙須暗埋法物方能壓勝沈振
達復帶伊同邨親戚張時重張汶儒及城中人
李惲等向我密商我說即使官兵前來總不能

敵我陰兵我一念誦符呪破之易如吹灰眾皆深信不疑索取緊皮藥而去隔了幾日不知地方官因何把我驅逐我正走出兩站有金雞郵人萬姓傅姓等來述沈振達的話將我截留擡赴金雞郵住在裕美店房內二十九日卽聞各郵齊吹牛角趕赴官坡將起解之人全行奪回是夜沈振達張時重張汶儒等都向我來說事已聞大總因回子京控所致明日大家都要進城殺盡回子我看勢難阻止只好聽之又乘機

催令速蓋陰兵臺一座各邨俱派布施我每日
拈香一次男婦老幼都來行禮並與我磕頭到
臘月底我對眾人說已調陰兵二萬六百名了
我又教李懶們做壓勝之物用臘捻成各種獸
形托以木板配以雞蛋等物於三更後暗埋各
城外七處大路說是能攔兵馬至本年二月間
得調來兵練有一萬數千之多又聞兵過彌渡
地方已將內外匪徒剿殺殆盡不但七哨人人
害怕我恐前許陰兵的話亦必盡露詭情竝探

知金雞邨人漸不信我法術伊等城鄉紳耆裔
議縛犯送官我恐被伊細獻又探有官兵四面
兜圍我若逃出恐被截拏只得於就近偏僻廟
宇暫行躲藏不料已被查知將我拏獲等供

臣

查該犯疊稱能調陰兵自係久蓄逆謀不止妖
言惑眾且木印鐫刻猛砮天下字樣尤堪詫異
復向再三嚴詰據供猛砮係耿馬土司界外隙
地不歸土司管轄我故父曾在該處住歇人稱
祖師上年我又經過其地希圖佔作頭人因刻

木戳一方留以待用其天下二字只就猛砮而言卽管理地方之意夷字上刻我故父之名亦只想壓服該處土人委無別故此戳並未行使故未沾有印色已蒙起出驗明至經卷均從夷地傳來並非自行編造銅羸係隨身配帶之物謂能騰雲駕霧不過哄騙愚民所稱調齊陰兵委係空言煽惑並無謀爲不軌別情

臣

訊供後

復於三月十五日親赴永昌府城巡閱營伍並查看保山城哨情形查其所謂陰兵臺者只係

搭蓋窩棚當卽飭令拆毀竝發掘周圍地內亦
絕無詭秘物件是其陰兵之說僅以惑眾騙錢
無他妙巧已屬顯然其城外七處大路埋藏蠟
獸等物均已剗出送驗所云能攔兵馬之說影
響全無臣回至永平又提該犯究詰堅如前供
案無遁飾查金混秋以猺夷潛匿邊地膽敢妄
布妖言惑眾倡亂致釀鬧案并敢捏稱能調陰
兵可敵千軍萬馬又捻造獸形埋藏城外大路
種種悖亂不法已極雲南地屬邊疆人心最易

惶惑未便因其尙無謀爲不軌實情稍存輕縱
金混秋除妄布妖言煽惑人心罪止擬斬不計
外應照謀叛已行從重加凌遲處死臣於審明
後卽恭請

王命將該犯金混秋綁赴市曹凌遲處死並傳首保
山城哨地方懸竿示眾以昭炯戒案係比照定
擬家屬應免緣坐其傳首爲徒及隨身服役各
犯均歸於滋事案內分別按例辦理另摺具
奏起出烏槍火藥發營配用經卷銅贏鐵帽銅帽

等物案結銷毀除將犯供發交臬司彙核詳送
撫_臣咨部備案外查保山地近夷方易惑師巫
邪術卽妖言毫無證驗亦致深信不疑以致藐
法抗官自罹重辟其兇頑固屬可惡而愚昧亦
屬可憐_臣現與撫_臣會商剴切示禁並嚴飭各
屬一體認真訪拏務期盡消奸慝弭患未萌以
仰副

聖主綏靖邊陲至意所有訪獲倡亂妖匪審明懲辦
緣由理合專摺具奏伏乞

皇上聖鑒訓示謹

奏

林文忠公政書

丙集雲噴奏稿

九